

Qeqqata Kommuniani najukkami ataatsimiititaliamut ileqqoreqqusaq

Kommunit aqunneqarnerat pillugu Inatsisartut inatsisaat nr. 29, 17. november 2017-imeersumi § 32, imm. 2, aamma Borgmesterinik borgmesterillu tulliinik kiisalu kommunalbestyrelsinut nunaqarfinnilu aqutsisunut ilaasortanik aamma najukkani ataatsimiititaliat ilaasortaannut il.il.akissarsiaqartitsineq pillugu Namminersorlutik Oqartussat nalunaarutaat nr. 25, 30. december 2013-imeersumi § 15 kiisalu 2019-imi maajip 29-ani kommunalbestyrelsip aalajangiinera naapertorlugit:

Kapitali 1

Siunertaq

§ 1. Najukkani ataatsimiititaliat sumiiffinni oqartussaaqataanermik suliaqarneq nukittorsassavaa, najukkani innuttaasut, peqatigiiffiit, kommunimi politikkerit oqartussallu najukkami inuiaqatigiit suleqatigalugit, tassuunakkut atortulersuutit, kulturi oqartussaaqataanermilu periarfissat naleqartitallu inerisarneqassallutik.

Suliassat

§ 2. Najukkami ataatsimiititaliat kommunalbestyrelsip suliakkiineratigut aalajangersimasunik suliaqartassapput.

Imm. 2. Najukkami ataatsimiititaliat kommunalbestyrelsimut, aningaasaqarnermut ataatsimiititaliamut imaluunniit ataatsimiititalianut ataavartunut siunnersuisartuussapput.

Imm. 3. Sumiiffimmi inuiaqatigiinnut, kulturimut, timersornermut inuiaqatigiinnilu sammisaqartitsinernut immikkoortunut immikkut pingaarutilinnut atatillugu, Najukkami ataatsimiititaliaq tusarniaanermut akissuteqaateqartassaaq.

Imm. 4. Najukat iluani tusarniaarnernut tusarniaasussaatitaaneq kiisalu najukat avataani tusarniaanernut paasissutissiisussaatitaaneq atuupput. Paasissutissiisussaatitaanermi najukkami ataatsimiititalianut, kommunip tusarniaanermut akissuteqaammik paasissutissiinissaq pineqarpoq.

Imm. 5. Ataatsimiititalianut ataavartunut kiisalu Aningaasaqarnermut Ataatsimiititaliamut oqaluuserisassanut ilanngunneqartussanik, najukkamut attuumassuteqartut eqqarsaatigalugit, najukkami ataatsimiititaliaq siunnersuuteqarsinnaavoq.

Imm. 6. Najukkami Ataatsimiititaliamut aningaasaliissutinit sumiiffimmi najugaqartut, peqatigiiffiit, kommunimi politikerit oqartussallu akornanni suleqatigiinnerat, kiisalu sumiiffinni inuiaqatigiit taakkulu timitalimmik, kulturikkut oqartussaaqataanerisalu periarfissaasa naleqartitaasalu attannissaat inerisaqqinnissaallu siuarsarneqassapput. Aningaasaliissutinik ingerlatsineq kommunip pisinnaatitsissutaanut kiisalu inatsisinik atuuttunik allanik naapertuilluni ingerlanneqassaaq.

Imm. 7. Nammineq atugassatut aningaasaliissutit isummerfiginissaannut suliani najukkani ataatsimiititaliat aalajangiisnaatitaapput. Najukkami ataatsimiititaliaq qaammat maaji naatinnagu. missingersuutissatut ukiumut tulluuttumut siunnersuutininik nassiussisassaaq. Aalajangerup siunertaa pitsaassusaalu Qullersaqarfiup allatseqarfianit qulakkeerneqartassaaq, aningaasaqarnermullu ataatsimiititaliamit akuersissutigineqartassalluni. Najukkami ataatsimiititaliaq qaammatit tamaasa qaammatip naannginnerani aningaasaliissutit qanoq atorneqarsimanersut uppersarnarlugit akiligassat, aningaaserivik karsilu pillugit allagaatit tamaasa Qullersaqarfimmi allatseqarfimmut nassiussisassaaq.

Imm. 8. Nammineq atugassanik aningaasaliissutinik atuinermi tullinguuttut pingaartinneqartassapput:

- Aaqqissuussat sumiiffinni najugaqartunut ataatsimoornerulersitsisut inooriaatsimillu ilorraap tungaanut saatitsinnaasut.
- Aaqqissuussat, illoqarfimmi innuttaasut, atuisut suliffeqarfiit akornanni, ukiut, inuiattut tunuliaqutit allatigullu assigiinngissutsit akimorlugit oqaloqatigiinnermik aamma/imaluunniit attaveqaatinik pilersitsisut.
- Aaqqissuussat, illoqarfimmi innuttaasut, atuisut suliffeqarfiit akornanni ataatsimoortunut assigiinnut - assersuutigalugu utoqqarnut, meeqqanut angajoqqaanullu kiisalu assigiimmik atugaqarlutik suleqatigiinnut sammisaqartitsinerit oqaloqatigiinnermik aamma/imaluunniit attaveqaatinik pilersitsisut.
- Aaqqissuussat neqeroorutillu illoqarfimmi kulturikkut, nipilersornikkut, timersornikkut, eqqumiitsuliornikkut kiisalu sunngiffeqarnikkut siuarsaasut ineriartortitsisullu.

Nammineq atugassatut aningaasaliissutit tusarniaassutinut tamanut ammasumik ingerlatitassanut, workshops-inut, suliniutinut, aaqqissukkanut allanut sulianulluunniit najukkami ataatsimiititaliap pilersitaanut aamma atorneqarsinnaapput

Imm. 9. Najukkami ataatsimiititaliaq ukiup naajartornerani novembarip qaammataani amerlanerpaamik 40.000 koruuninik nammineq atugassatut aningaasaliissutinik atunngitsuugaqarsimappat, Qullersaqarfiup allatseqarfianit siunertaq akuersissutigineqarpat, Aningaasaqarnermut Ataatsimiititaliaq akuersiteqqaarnagu, najukkami ataatsimiititaliami isumaqatigiittoqartillugu aningaasaliissutit atugassanngortissinnaavai.

Imm. 10. Kommunalbestyrelsip najukkani ataatsimiititalianut nammineq atugassatut aningaasaliissutinik immikkoortitsineratigut, kommunalbestyrelsit susassaqarfinnut inatsit naapertorlugu pisussaaffii atuutiinnassapput.

Imm. 11. Nammineq atugassatut aningaasaliissutit aaqqissuussaqarfinni imigassallerfiusunut atorneqassanngillat.

Imm. 12. Aningaasat atorneqanngitsut ukiup tullianut nammineq atugassatut aningaasaliissutinut nuunneqarsinnaanngillat.

Imm. 13. Qeqqata Kommuniani Qullersaqarfik, Najukkami ataatsimiititaliami allatseqarneq ingerlappaa.

Qeqqata Kommuniani Najukkami ataatsimiititaliat

§ 3. Sisimiut Maniitsullu illoqarfiini Najukkami ataatsimiititaliaqarpoq.

Kapitali 2

Qinersineq

§ 4. Innuttaasunik ataatsimiisitsinermi najukkami ataatsimiititaliamut qinersineq pissaaq, qinersisoqarnissaalu ullut 14-it sioqqullugit nalunaarutigineqassalluni. Qinigassanngortittut tamarmik naligiissillugit tulleriiaarneqassapput.

Imm. 2. Inersimasut 18-ileereersimasut Qeqqata Kommuniani najugaqavissut, qinersinissaq qaammatit arfinillit sioqqullugu najugaqavissut kikkulluunniit najukkami ataatsimiititaliamut nammineq illoqarfigisami qineqqusaarsinnaapput, pineqartoq Kalaallit Nunaanni eqqartuunneqarnermikkut oqartussaassuseeritsisimangippat.

Imm. 3. Imm. 2 naapertorlugu kinaluunniit qinersinnaatitaasoq, Najukkami ataatsimiititaliamut qinigaasinnaatitaavoq, pineqartoq inaarutaasumik eqqartuussinikkut akiliisitsissutissamilluunniit pinerluttulerinermi inatsisit tunngavigalugit pineqaatissinneqarsimangikkuni, pissutsimut nalinginnaasumik isigineqarnermi Najukkami ataatsimiititaliamut ilaasortaanissamut ataqqinarunnaarsitsisumik.

Imm. 4. Najukkami ataatsimiititaliamut qinigassanngortinnissamik nalunaaruteqartut, inatsit naapertorlugu nalunaaruteqarnerminni meeqqanik pinerliisimanginnermut pinerluuteqarsimanginnermullu uppersaatinik immersuisussaataapput.

Imm. 5. Qinersinermi, innuttaasunik ataatsimiisitsinikkut ingerlanneqartumi, kikkut tamarmik 18-ileereersimasut kiisalu illoqarfimmi najugaqavissut qinersinnaatitaapput. Qineqqusaartut akornanni qinersinissamut takkuttut innuttaasunit qinerneqassapput. Innuttaasoq ataaseq qinersinnaatitaasoq, ataasiartumik qinersinnaavoq. Taasineq isertortumik ingerlanneqassaaq, allakkatigullu taasisoqassalluni.

Imm. 6. Najukkami ataatsimiititaliamut qinigassanngortinniarluni nalunaarneq, qinersinissaq ullunik tallimanik sioqqullugu sumiiffimmi kommunip allaffianut nalunaaruteqarnikkut pissaaq.

Imm. 7. Qinigassanngortitsinermi pisinnaatitsineq inerteqqutaangilaq.

Imm. 8. Qinigassanngortittut akornanni tallimat inorlugit sassartoqassappat qinersineq pissangilaq, taamaalilluni illoqarfimmi pineqartumi najukkami ataatsimiititaliamik pilersitsisoqassanngilaq. Qinigassanngortittut tallimaannaappata ingerlaannaq akuersissutigisassanngorlugit kommunalbestyrelsimut innersuunneqassapput.

Imm. 9. Qinigassanngortittut taaneqarnerpaat tallimat najukkami ataatsimiititaliamut ilaasortanngornissaannut kommunalbestyrelsimut innersuunneqassapput. Najukkami ataatsimiititaliamut qinerneqanngitsoortut sinniisussanngortussanngorlugit kommunalbestyrelsimut innersuunneqassapput.

Imm. 10. Amerlaqatigiittumik qinersisoqartillugu, makitsinikkut qinersineq aalajangiiffigineqassaaq.

Imm. 11. Innersuunneqartut kommunalbestyrelsimut akuersissutigineqarneri tunngavigalugit najukkami ataatsimiititaliaq inissitsitissaaq. Taamaaliortoqassaarluni innersuussat kommunalbestyrelsimut akuersissutigineqareernerini kingusinnerpaamik ullut 21-t qaangiutsinnagit.

Imm. 12. Kommunilbestyrelsimut nutaamut qinersereernerit tamaasa, qinersineq ingerlanneqartassaaq.

Najukkami ataatsimiititaliap inuttalersornera il.il.

§ 5. Sisimiuni Najukkami ataatsimiititaliaq arfineq marlunnik (7) ilaasorta qarpoq aamma Maniitsumi Najukkami ataatsimiititaliaq tallimanik (5) ilaasorta qarpoq. Innersuussinerup kingorna najukkani ataatsimiititaliani ataasiakkaani ilaasortat Sisimiuni arfineq marluk aammalu Maniitsumi tallimat kommunalbestyrelsimit toqqarneqassapput.

Imm. 2. Sinniisunut allattorsimaffik Qullersaqarfimmit suliarineqassaaq. Allattorsimaffinni qinigassanngortitat qinigaanngitsut allanneqassapput, kisianni pisinnaanngitsoqalerneratigut sinniisussatut najukkami ataatsimiititaliamut ilaasortanngorsinnaatitaasut. Sinniisussanik allattorsimaffik najukkani ataatsimiititalianut ataasiakkaanut suliarineqassaaq, taamaalillutik qinigassanngortittut qinigaanngitsulli taagorneqarnertik malillugu tulleriinnilersorneqassallutik.

Imm. 3. Qinigassanngortittut arlallit sinniisutut allattorsimaffimmiittut akornanni naligiimmik qinerneqarsimappata tulleriaarneri makitsinikkut aalajangerneqassapput, Qullersaqarfimmi aqutsisoq makitsisuusaaq.

Imm. 4. Najukkani ataatsimiititalianut ilaasortat inatsisartunut, kommunalbestyrelsimut imaluunniit folketing-imut ilaasortaassanngillat.

Imm. 5. Najukkami ataatsimiititaliami ilaasortat allamut nuunnerini, ataatsimiititaliamit tunuassapput. Aammattaaq najukkani ataatsimiititalianut ilaasortat kommunalbestyrelsimut, inatsisartunut imaluunniit folketingimut qinigaasut taamatut.

Imm. 6. Najukkani ataatsimiititalianut ilaasortat namminneq kissaatertik malillugu qaqugukkulluunniit ataatsimiititaliamit tunuarsinnaapput. Taamaattoqartillugu Najukkami ataatsimiititaliamut siullertut sinniisoq ilaasortanngortinneqassaaq.

Imm. 7. Najukkami ataatsimiititaliaq ikinnerpaamik Sisimiuni sisamanik ilaasorta qarlungi aammalu Maniitsumi pingasunik ilaasorta qarlungi ingerlaannarsinnaapput.

Siulersuisumik siulersuisullu tullianik qinersineq

§ 6. Ataatsimiititaliap ataatsimeerngaarnissaanut ilaasorta angajulleq (utoqqaanerpaaq) aggersaassaaq.

Imm. 2. Ilaasortat akornannit Najukkami Ataatsimiititaliap siulittaasussaa ataatsimeerngaarnermi amerlanerpaanik taaneqartoq siulittaasunngussaaq. Ataatsimiinneq ilaasortamit angajullerpaamit (utoqqaanerpaaq) aqunneqassaaq. Siulittaasumik qinersineq pereerpat najukkami ataatsimiititaliaq siulittaasup tullianik qinersissaaq, taannalu siulittaasup pisinnaannginnerani taartaasassaaq.

Imm. 3. Najukkami ataatsimiititaliami ilaasortat siulittaasutut imaluunniit siulittaasup tulliatut qinigassanngortinnissamut pisussaaffiligaanngillat.

Imm. 4. Siulittaasoq imaluunniit siulittaasup tullia najukkami ataatsimiititaliamit tunuarpat, najukkami ataatsimiititaliap piffissap sinnerani atuunnissaa pillugu nutaamik qinersissaaq.

Kapitali 3

Ataatsimiittarnerit

§ 7. Ileqquusumik ataatsimiinnerit qaqugu sumilu ingerlanneqassanersut najukkami ataatsimiititaliap aalajangertassavaa. Piffissaq sumiiffillu kingusinnerpaamik ullut 14-it sioqqullugit tamanut nalunaarutigineqartassapput.

Imm. 2. Ataatsimiititaliamut apeqquteqaatit allakkatigut ingerlanneqassapput. Ileqquusumik ataatsimiinnissaq kingusinnerpaamik ullunik arfineq-pingasut sioqqullugu allakkatigut suliassaq oqaluuserineqassasoq qinnutigineqarsimappat, taanna siullermik ataatsimiinnissami oqaluuserisassanut siulittaasumit ilanngunneqassaaq.

Imm. 3. Siulittaasup kissaateqarneratigut, kingusinnerpaamik ileqquusumik ataatsimiinnissaq ullunik marlunnik sioqqullugu oqaluuserisassat ilaasortanut ataasiakkaanut nassiunneqassapput.

Imm. 4. Najukkami ataatsimiititaliap ataatsimiinnissai siulittaasumit piareersarneqartassapput ilaasortanillu ataatsimiigiaqqusisartuussalluni. Najukkami ataatsimiititaliami isumaqatigiinniarnert taasinerillu siulittaasumit aqunneqassapput, taassumalu aalajangerneri eqqortumik ingerlanneqarnissaat isumagissallugit.

Imm. 5. Suliap isumagineqartarneri siulittaasumit nakkutigineqassapput.

Imm. 6. Immikkut ittumik ataatsimiittoqarnissaanut aggersaanermi ataatsimiititaliami siulittaasup ilaasortat sapinngisamik annertunerpaamik ataatsimiinnermi suliap sularineqartussat pillugit ilisimatittassavai.

§ 8. Najukkami ataatsimiititaliaq tamanut ammasumik ataatsimiittassaaq.

Imm. 2. Suliap qanoq ittuussusaa pissutigalugu suliap ataatsimiinnermi matoqqasumi pisariaqarsorineqarpat najukkami ataatsimiititaliamit oqaluuserineqarsinnaavoq. Suliassap matoqqasumik ataatsimiissutigisariaqarneranik apeqqut matoqqasumik ataatsimiinnermi isumaqatiginninniutaassaaq, matumani taamaaliornissaq najukkami ataatsimiititaliamit imaluunniit siulittaasumit aalajangerneqarpat.

Imm. 3. Najukkami ataatsimiititaliap suliassat matoqqasumik oqaluuserineqarneranni inunnik kommunimi atorfeqartunik najuuttoqarsinnaanera akuerisinnaavaa. Taamaattorli Qullersaqarfik sulisumik peqataatitaqartoqartuaannarsinnaavoq, aamma suliap ataatsimiinnerni matoqqasuni oqaluuserineqarnerisa nalaanni. Suliassap matoqqasumik oqaluuserineqarnerani inuit allat najukkami ataatsimiititaliap aggeqqusinnaavai, suliassap nassuiarneqarnissaa pissutigalugu tamanna kissaatiginarpat.

Aalajangiisinnaassuseqarneq

§ 9. Sisimiuni ilaasortat ikinnerpaamik 4/7 najuutsillugit aammalu Maniitsumi ilaasortat ikinnerpaamik 3/5 najuutsillugit najukkami ataatsimiititaliat aalajangiisinnaapput.

Imm. 2. Najukkami ataatsimiititaliaq ilaasortamit piomasaqartoqarnera tunngavigalugu aalajangersinnaavoq, ilaasortaq tele aqqutigalugu attaveqatigiinnikkut atortorissaarutit iluaqutigalugit ataatsimeeqataasinnaasoq.

Imm. 3. Najukkami ataatsimiititaliap ataatsimiinnerani siulittaasooq aqutsisuussaaq, taassumalu peqannginnerani siulittaasup tullia aqutsisuussalluni. Siulittaasup oqaluuserinninnerup aqunneqarnera ataatsimiinnerullu nalaani torersumik pissuseqarnissaaq pillugu apeqqutit tamaasa aalajangiiffigisassavai. Aammattaaq siulittaasup oqaluuserisassat sorliit taasissutigineqassanersut oqaasertalersortassavai.

Imm. 4. Kinaluunniit oqaaseqarusuttoq siulittaasumut saaffiginnissaaq, taassumalu oqaaseqarumallutik nalunaartut tulleriinneri malillugit oqaaseqartittassavai. Ilaasortat arlallit oqaaseqarumallutik ataatsikkut piumasqaateqarpata siulittaasup oqaaseqartussat tulleriinnilissavai. Oqaaseqartut siulittaasumiunngitsumit kipitinneqassanngillat.

Imm. 5. Ataatsimiititaliamit aalajangerneqartassaaq ilaasortaq imatut soqutigisaqarnerseq, ilaasortaq ataatsimiititaliap suliamik suliarinninnerani peqataasinnaanani. Ilaasortap pissutsinik inuttut soqutigisaqarnini pissutigalugu ataatsimiissutiginninnerni taasinernilu peqataasinnaanerminut nalornisoornartoqalersitsinnaatillugu, Najukkami ataatsimiititaliami siulittaasooq ilisimatissavaa.

Aalajangiinernut allattaavik

§ 10. Najukkami ataatsimiititaliap aalajangerneri aalajangiinernut allattaavimmut allattorneqartassapput, ataatsimeereernerillu kingorna tamatigut ilaasortat ataatsimeeqataasut atsiortassallutik.

Imm. 2. Ilaasortaq kinaluunniit ataatsimiinnermut peqataasimasooq, akerliulluni isummersimanini aalajangiisimanermut imaqarniliamut ilanngunneqarnissaanik piumasqaarsinnaavoq, tamannalu suliap nassiunneqarnerani kingusinnerusukkut isummersuutigisamut tunngavilersuutigisat nassiunneqarsinnaallutik.

Imm. 3. Ataatsimiititaliap tamatigut ataatsimiinneranit imaqarniliaq, siulittaasooq suleqatigalugu, Qullersaqarfimmit suliarineqartassaaq. Imaqarniliaq ataatsimiititaliap ataatsimiinnerata kingorna kingusinnerpaamik ullut tallimat qaangiuppata ilaasortanut tunniunneqareersimassaaq.

Ilaasortat suliniuteqarsinnaatitaanerat

§ 11. Najukkami ataatsimiititaliamut ilaasortap kialuunniit kommunip susassaarfii pillugit apeqqutit suulluunniit najukkami ataatsimiititaliamut saqqummiussinnaavai, aammalu tamakku pillugit aalajangiinissanut siunnersuutinik saqqummiussinnaalluni.

Kapitali 4

Ilaasortat suliasanik takunnissinnaatitaanerat

§ 12. Ataatsimiititaliap suliatut tigummisai kommunip allaffeqarfiani inaarneqarsimasutut saqqummiunneqartut pillugit, najukkami ataatsimiititaliamut ilaasortat kikkulluunniit sulinerminnut atatillugu suliatut atortussat misissuataarsinnaatitaavaat.

Imm. 2. Imm. 1 naapertorlugu suliamik takunnissinnaatitaanermut qinnuteqaat najukkami ataatsimiititaliami siulittaasumut qinnutigineqassaaq.

Imm. 3. Suliap suliarineqarnera eqqarsaatigalugu, imaluunniit suliamik takunnissinnaatitaaneq pissusissamisuunngitsumik ajornartoortitsissappat suliamik takunnissinnaatitaaneq, pisariaqarsorineqarpat, borgmesterimit killilerneqarsinnaavoq.

Imm. Najukkami ataatsimiititaliamut ilaasortaq kinaluunniit qinnuteqarnini naapertorlugu imm. 1-3-mi periarfissamik atuinermi suliamut aalajangersimasumut tunngasumi takunnissinnaatitaaffimmini suliap

assinganik nassinneqarsinnaavoq. Najukkamili ataatsimiititaliaq erseqqinnerusunik suliamut tunngasunik paasissutissanik nassinneqarsinnaanermut tunngatillugu, matumani killiliisinnaaneq ilanngullu maleruagassiorsinnaavoq, tamanna pisariaqartinneqarpat.

Kapitali 5

Sinniisunik aggersaaneq

§ 13. Ilaasortap ataatsimiigiaqqusissutip tigunerani peqqissutsimik, naartunermik, erninermi sulinngiffeqarnermik imaluunniit meeravissartaarnermik, allatigut pisortani inuussutissarsiuteqarnermik, niuerneramik assigisaanilluunniit peqquteqartumik ataatsimiinnissami ataatsimi tulliuttuniluunniit arlalinni najukkami ataatsimiititaliami ataatsimeeqataasinnaanginnini siulittaasumut nalunaarutigissavaa. Tamatuma kingorna ataatsimiinnissamut sinniisooq siulleq siulittaasumit aggersarneqassaaq.

Imm. 2. Ilaasortaq ataatsimiititaliami sulinini nangeqqissinnaanngorpagu, sinniisooq najukkami ataatsimiititaliamit tunuassaaq.

Imm. 3. Sinniisup ivertinneqarnerani piunasaqaatit qanoq issanersut najukkami ataatsimiititaliamit aalajangiiffigineqassaaq.

Kapitali 6

Najukkami ataatsimiititaliap kommunalbestyrelsimut ilisimatitsissuteqartussaataanera

§ 14. Najukkami ataatsimiititaliap sumiiffimmi suliai pillugit pissutsinik paasissutissiinissamut kommunalbestyrelsimit piunasarineqartunut, najukkami ataatsimiititaliamit aqutissiuunneqarlunilu nalunaarfigineqassaaq.

Imm. 2. Najukkami ataatsimiititaliaq kommunalbestyrelsillu aallartitai ikinnerpaamik ukiumut ataasiarlutik oqaloqatigiinnikkut ataatsimeeqatigiittassapput.

Kapitali 7

Akissarsiat il.il.

§ 15. Najukkami ataatsimiititaliamut ilaasortatut sulinermi akissarsiat kommunalbestyrelsimit aalajangersarneqartassapput.

Imm. 2. Akissarsiat kommunalbestyrelsimit akigitatut aalajangiunneqartut naapertorlugit atuutsinneqartassapput. Maannakkut akigitatut ilaasortanut borgmesterip akissarsiaata 1/35 delii, najukkami ataatsimiititaliap siulittaasuanut borgmesterip akissarsiaata 1/30 delii ileqqoreqqusap matuma atuutsinneqalernerani atuutissapput.

Imm. 3. Akissarsiaqartitsinermi najukkami ataatsimiititaliamut ilaasortanut taamaallat atuutsinneqarpoq.

Imm. 4. Ataatsimiinnernut, Najukkami ataatsimiititaliami ataatsimiinnernut kiisalu innuttaasunik ataatsimiisitsinernut peqataanernut akissarsiaqartitsineq atuuppoq.

§ 16. Suleriaatsimi ileqqoreqqusamilu matumani malittarisassat najukkami ataatsimiititaliamit malinneqarnersut kommunalbestyrelsimiit nakkutigineqassaaq, aammattaaq pisortani malittarisassat atuuttut naapertorlugit ingerlatsisoqassalluni.

Kapitali 8

Atuutilersitsineq allannguutillu

§ 17. Malittarisassat allanngortinneqarneri Kommunalbestyrelsimiit aalajangiiffigineqassapput, najukkami ataatsimiititaliamit inassuteqartoqareernerata kingorna aamma tamanna pisinnaavoq.

§ 18. Ileqqoreqqusaq ulloq maajip 29-at 2019-imi atuutilersinneqarpoq.



Malik Berthelsen

Borgmesteri